



TEKS UCAPAN
YANG BERBAHAGIA DATUK HAJI ABANG ABDUL WAHAP BIN HAJI ABANG JULAI
MAJLIS MAKAN MALAM PENGHARGAAN SUMBANGAN SUKARELAWAN
8 APRIL 2015 (RABU)
THE CLUB, LOBBY LOUNGE, RIVERSIDE MAJESTIC HOTEL

Terima kasih saudara Pengacara Majlis...

Bismillahirrahmanirrahim.....

Yang Berusaha Dr. Saadiah Hj. Abdul Samat
Pengarah, Dewan Bandaraya Kuching Utara

Yang Berusaha Puan Hajah Kartina Zamhari
Ketua Timbalan Pengarah, Dewan Bandaraya Kuching Utara

Pegawai-pegawai kanan DBKU

Para sukarelawan

Para wartawan serta

Tuan-tuan dan puan-puan yang saya kasihi sekalian

Assalamualaikum Warahmatullahi Wabarakatuh.....

Salam Sejahtera dan Selamat Malam....

Pertama sekali saya ingin mengucapkan syukur kehadiran Allah SWT kerana dengan limpah dan kurniaNya maka dapat kita berkumpul pada malam ini untuk bersama-sama menghadiri Majlis Makan Malam Penghargaan kepada para sukarelawan kita yang telah banyak membantu DBKU secara sukarela, tanpa dipaksa dan tanpa mengharapkan apa-apa balasan ketika penganjuran pelbagai aktiviti / program / majlis DBKU.

Tuan-tuan, puan-puan dan para sukarelawan yang saya kasihi sekalian,

Seperti yang telah saya katakan tadi, majlis kita pada malam yang indah ini diadakan adalah khusus untuk para sukarelawan kita yang telah banyak terlibat secara langsung membantu DBKU menjayakan pelbagai aktiviti / program / majlis anjuran DBKU. Percayalah, tanpa bantuan, sokongan dan kerjasama daripada tuan-tuan dan puan-puan sekalian, segala persiapan dan persediaan kami lakukan dalam penganjuran pelbagai aktiviti, program dan majlis DBKU pasti tidak akan lengkap.

Justeru, Majlis Makan Malam pada malam ini diadakan sebagai tanda terima kasih tak terhingga daripada DBKU kepada anda semua. Saya tahu, sebuah majlis makan malam sahaja tidak memadai jika dibandingkan dengan sumbangan dan bantuan yang telah diberikan oleh para sukarelawan. Namun seperti yang saya katakan tadi di awal ucapan saya, penglibatan tuan-tuan dan puan-puan adalah secara sukarela, tanpa dipaksa dan tanpa mengharapkan apa-apa balasan. Itu lah kelebihan yang ada pada tuan-tuan dan puan-puan sebagai sukarelawan yang pasti tidak semestinya ada pada semua orang. Syabas saya ucapkan!!!

Tuan-tuan dan puan-puan,

Penekanan budaya kesukarelawanan kini merupakan suatu isu yang semakin mendapat perhatian dan popular dalam pentadbiran dan pembangunan sesebuah negara. Ini adalah kerana impak amalan budaya sebegini sangat dalam terhadap pembangunan kehidupan masyarakat seharian. Antara contoh amalan budaya kesukarelawanan yang dapat kita lihat adalah seperti :-

- Pertubuhan dan Gerakan Sosial
- Penglibatan dalam aktiviti dan khidmat sukarela seperti kebajikan, pemulihan, pembangunan, pendidikan, keselamatan, kesihatan, pemuliharaan alam sekeliling, kepenggunaan, dan lain-lain.
- Sumbangan kemahiran-kemahiran yang sedia ada.

Di sebahagian negara di dunia, kesukarelawanan ternyata suatu sektor yang pantas berkembang dan dianggap penting barangkali kerana sangat jelas impaknya kepada pembangunan sosial, malahan juga kepada pembangunan ekonomi mereka. Selain daripada itu juga, untuk negara-negara yang sudah maju, mereka mempunyai sistem data khas yang diwujudkan bagi memudahkan pentadbiran / pengurusan hal-hal yang berkaitan dengan kesukarelawan ini.

Untuk negara kita Malaysia pula, sektor sukarela atau sukarelawan juga telah memberikan sumbangan yang sangat bermakna kepada pembangunan masyarakat kita , namun beberapa perkara kita masih perlu ditingkatkan agar setanding dengan negara-negara maju. Oleh yang demikian, saya cadangkan antara langkah awal yang boleh kita lakukan bagi meningkatkan pengurusan atau pentadbiran sektor sukarelawan adalah seperti satu sistem pangkalan data diwujudkan untuk menghimpunkan semua senarai nama para sukarelawan yang pernah berdaftar dengan kita di DBKU kerana ianya akan memudahkan pencarian para sekarelawan sekiranya kita memerlukan khidmat dan bantuan mereka.

Tuan-tuan dan puan-puan,

Tuan-tuan dan puan-puan,

Sebelum saya mengakhiri ucapan saya pada malam ini, adalah menjadi harapan saya agar selepas ini, lebih ramai lagi para sukarelawan akan tampil dan mendaftarkan diri mereka kepada kami di DBKU. Lebih ramai yang tampil adalah lebih baik kerana ianya akan memeriahkan lagi keluarga besar DBKU. Apa yang pasti, kesudian tuan-tuan dan puan-puan untuk membantu kami dalam apa juga aktiviti, program dan majlis yang kami adakan adalah sangat kami hargai.

Tanpa berceles lebih panjang lagi saya sudahi ucapan saya pada malam ini dengan Wassalamu'alaikum dan terima kasih.